

四庫全書

集部

欽定四庫全書

石倉歷代詩選卷三百四十三

明 曹學佺 編

明詩初集六十三

周致堯

崇德人

述懷

平生遠塵事畏觸憂患端矧茲值多故而敢懷自安寄
身途旅中戚戚苦飢寒為生恥無庸緝遺守微官雖云

匪多秩所職期可觀顧非周員器軌事仍獨難蹇予亦
何為俛仰徒長嘆

修禊日偕曹廣文七人遊南湖賦得裴休舊業
休字公美捨宅為寺今真如寺是也

幽賞殊未窮揚舲濟南湖載瞻裴公宇蕭條乃禪居緬
思太和年秩班百寮初晚懷超俗緣息心究空虛歲月
既云邁世事亦已徂我我清輝堂遺構委榛蕪斯人不
可為慨傷獨在余

三月望日偕曹廣文遊南園得多字

暮春適休暇步遊散煩疴復茲名園賞為樂詎云多依
叢愛繁綠緣沿弄輕波景幽興彌臻慮澹神始和誰思
遽旋歸夕曛在城阿永諧塵外蹤明晨復來過

夏夜宿流虹寺有感

馳騫竟朝暮似緣飢凍迫如何百年間區區為形役世
途寡相知覩顏徒自飾所獲既非寶所喪良可惜生理
固草草進退量我力豈乏希世榮前車已當阮流光急

奔馬素業紛斷織聖道卒未聞但焉增內惕

詠軒為金子尚賦

大雅輟微響新聲競哇淫行行誰不迷舉世莫能箴慨
彼深巷士淵淵多古心覽物易成感呻吟暢中襟初聆
韶濩鳴再聽鸞鵠吟清泠播空象要妙諧八音詎惟孱
懦興幽夔亦蕭森緣知美刺間感創非獨今王風日已
覃王澤日已深殷勤誦功德永遠被瑟琴

感興

蕭蕭五花馬矯矯七尺身飲馬恒以時剪刷謂有神輕
泥障文錦新鞍被雕銀所期越千里不辭廝養勤過都
未及試一蹶不再伸吁嗟世之人求名不求真

題俞仲剛山水

我昔四明尋隱者著屐遠過玉几山巖扉苔徑轉森邃
結窠迺在雲松間松間迴風蕩空影水流花開春日永
苧服涼深團扇開好鳥飛來意俱靜為覓漁梁白沙步
因識樵人奕棋處扁舟煥泊碧溪陰浴月長歌下山去
欽定四庫全書
石倉歷代詩選
卷三百四十三
三

懷古

我愛陶淵明所居惟種柳與世實寡諧委懷在杯酒不
有千古心誰識千載後意欲從之遊斯人復何有

雨後步南園

栽蔬偏南圃雨足蔬已長晨夕供採掇筐篚充所將豈
無膏粱思自顧不可常願言使無違澹泊庸何傷

虛白室為毛經厓賦

端居養幽素冲然澹無滓豈乏華藻榮涅緇恐茲始一
室洞昭融於焉表微旨蒙莊亦何人先予契斯理

送劉中得行字

惠風育繁卉旭景藹春晴端居感時遷况抱離人情華
觴愜未足中懷在嚴程還當南榮卧悵對浮雲行
聽顧道友吹雙孔笛

幽人製清管二指宣宮商夕響隨風迴餘悲繞山長危
葉振欲脫微波動還揚遠近同一聽感余非故鄉

古詩

應龍果何物變化在斯須噓氣雲霧蒸下雨澤九區差
差喉下鱗嬰之能殺軀那因情欲牽泰畜同淵魚

其二

邯鄲有猛虎曾參能殺人斯固不足憑浮言亂其真儉
人舌下刀數加君子身何如冥冥羽不為矰繳親

其三

團團青銅鏡昔從軒轅鑄面涵孤月光背隱雙龍跗美
貌欣自修醜容羞見妬人心自親疎鏡明只如故

其四

猗蘭生中谷不采恒自香園丁亦何知掇置近中堂朝
培根愈萎暮沃葉已黃將養雖以時物性終見傷

其五

蕭蕭水中蒲瑣瑣蒲上禽託身自得所不忘層層侵天
風斷枯條卵破巢亦沈茲焉復何尤慎之在初心

夏日即事

新浴坐溪館微涼在虛襟風條振宿雨石泉和鳴琴因
茲塵外境怡我闕世心何事城郭居煩思苦沈沈

雨夜感懷二首

卧聞窗間雨蕭颯夜將深轉望壁上燈依微照孤衾撫
茲淒絕候感此遲暮心平明視青鏡白髮滿華簪
攬衣起中夜感歎成歡歌百年事形骸所得良不多生
理既茫昧動靜防禍羅歸哉南山陲石田蔭松柯

秋夜不寐三首

高館夜無寐孤衾轉蕭爽驚風振庭柯落葉走階響沈
憂靜中起離懷益難廣寂寞誰晤言殘燈耿虛幌

淩落頗已久衰遲亦何甚因念平生懷悲悽不能寢薄
帷照明月中宵益淒凜展轉殊未休疎鐘度高枕

昨日又今日今朝又明朝蹉跎竟何為坐令顏髣凋代
耕既非望閉居亦無聊孤懷共誰寫仰屋奏七謠

訪鮑仲孚先生隱居

溪上齋居好幽偏事不侵桑麻存晚計圖史樂初心
疇憤幽窗曉移牀綠樹陰卜隣何代老從此數相尋

次石監征韻

憶子臨東海征帆幾日回鼉鳴津鼓合蜃起石樓開
官酒應深酌春衣或未裁題詩紀遊歷時寄到蓬萊

次陳彥博編修雨中見懷

澤國仍多雨溪流沒兩涯墟煙迷小市泥草亂空階
蘊藉詩中意蒼茫病裏懷明朝晴色好對話兩情諧

送崇德州夏同知

慷慨持征節，雄談息戰塵。
有生皆帝力，無地不王臣。
為國丹心在，論功白髮新。
他年忠義傳，端合繼前人。

送人歸楚

楚甸荒涼舊鎮微，春來漸覺思依依。
故鄉兵後今誰在，遊子江南恨獨歸。
長路關心聞過雁，孤城回首見斜暉。
家人十載傷離別，芳草閒堂靜掩扉。

寄沂陽劉廷鎮員外

故人相與最從容尚憶論詩五夜中
白首無家千里別
青山何處一樽同
夢回孤館燈前雨
目斷西風塞上鴻
誰識離懷愁絕處
野庭依舊穆陵東

吳中

兩岍春雲暗柳條
滿篷風雨過楓橋
空憐越絕溪山好
且聽吳趨巷陌遙
官舍晚涼飛燕子
水鄉人靜賣魚苗
誰家白晳佳公子
賸把黃金買阿嬌

寄子高都事

昔年相與最多情尚憶聯鑣度錦城御水滿溝看洗馬
宮牆隔樹聽流鶯別來故舊今誰在老去艱虞只自驚
山色湖光總無賴不堪幽獨轉愁生

登崇德城有感

溪上孤城百雉餘城門猶自護儲胥霸陵空宿將軍騎
范叔應隨使者車雞犬蕭條兵過後漁樵散漫市休初
老年觸事多成感閒向芭蕉葉上書

寄舍弟鼎

生計依人轉寂寥別來心事向誰消鏡中華髮隨年改
溪上青山入夢遙對酒便思歸白社將書不敢寄洪喬
越情吳思渾無賴獨倚江樓送暮潮

臨平道中寄京師諸友

雲外羣山綰翠螺馬蹄長是客中過關河樹色秋光近
驛路蟬聲晚更多千古心期空皓首百年人事等滄波
自慚薄劣頻趨走幾度因風想玉珂

春日雨中漫成次顧玉山韻兼柬石監征

十日春泥懶入城，滿湖風雨未開晴。
草堂欲補寧忘破，沙鳥頻來莫漫驚。
橋外柳條隨意綠，坐間苔色傍人生。
緣知花事渾能幾，好買芳樽對客傾。

寄劉孝章經歷

意氣傾人記昔年，東風飛蓋日翩翩。
花明古戍春停騎，月上清江夜放船。
老去交游誰更健，亂來蹤跡總堪憐。
山光水色渾無賴，却數冥鴻野外天。

次韻送陳壽夫之湖州

識君雖早送君遲却愧相看在亂離十口一家無別業
此身何日是閒時青山滿路春船酒白月空江客枕詩
我有好懷誰得共鷗波千頃雨絲絲

寄吳興張別駕

鴛鴦飛去潦波平曾聽驪歌憶送行南浦移舟官樹綠
西亭酌酒晚風晴異鄉春近多新夢遠使書回足舊情
欲識懷君無限意滿城芳樹亂啼鶯

送曹廣文賦得富覽亭

危亭突兀斗城陰
風物蒼茫入望沈
萬古東南多壯觀
百年豪傑幾登臨
夜中日出扶桑近
天外江流灩澦深
好趁歸帆拂天姥
共憑寥廓寄微吟

蔣氏小瀛洲

茫茫人海小瀛洲
靈草丰茸碧樹幽
底用風輪通弱水
時逢雲袂下浮丘
天陰圖畫龍鱗濕
月夜簫聲鶴背秋
我亦平生有仙骨
歸來同作采真遊

次韻顧玉山見寄

白水青山杳渺邊，每懷高節自茫然。
不從猿鳥疏名姓，虛託鱗鴻問歲年。
燈外簷花清夜雨，江頭雲樹暮春天。
須知無限滄洲意，渺渺東風一旆懸。

渡錢塘江

日出長江煙霧開，越山吳樹抱江迴。
霸圖踪跡空今古，天塹東南有劫灰。
山郭雨昏雲似墨，海門潮急浪如雷。
舟師省柁須看客，不數瞿塘滬渚堆。

西津夜泊

孤帆夜落石橋西
橋外青山入會稽
卧聽海潮吹地轉
起看江月向人低
一春衰謝憐皮骨
萬國艱虞厭鼓鼙
何處客船歌水調
令人歸思益淒迷

送南臺察掾張志學赴都

蓬萊宮闕五雲間
天上羣仙集珮環
珥筆每同花下散
玉珂時聽月中還
清秋幙府芙蓉靜
白日門屏獬豸閒
浩蕩天風吹鶴馭
春朝入覲紫宸班

次韻顧玉山寄張子淵

險宦何殊闕九淵且將蕭散事餘年
風前白苧裁春服花外青藜挂酒錢
聖世敢云輕紱冕野人端合老林泉
養生況有封囊藥坐聽流鶯手自圓

春日偕顧玉山汎舟平家湖訪石仲德次韻

湖上春光生綠波湖頭柳色似新鶯
已知出郭塵諠少更喜臨流樂事多
穩坐蘭舟勝上馬新裁苧服不須羅
茆堂只隔東西瀼隨意相從載酒過

送僧住徑山

開士持衣登祖寺迢遙雙徑接空虛清晨唱梵層雲表
白日傳燈劫火餘山抱郡城飛雉堞井通瀛海躍神魚
高情也愛談禪悅許近牛鳴便築居

琦元璞所藏趙子昂馬圖

進馭歸來日未西落花芳草滿春泥也知樵上無凡馬
牽過天關不肯嘶

雙松圖

鑿鑿岷峨插彼蒼海波不動海天涼雙蛟化作神仙去

明月中宵劍影長

附高遜志

字士敏翰林院學士
蕭山人寓嘉興

送澄上人南還

東南多名山可望不可即
兵塵浩無際焉敢妄行役
如何浮屠師周覽思振錫而道不在遠去去欲誰覓名相
既虛假空焉訪遺跡真源浩無窮尋流安有極古來超
世人觀妙向空壁欲了第一機終當絕聞得幻盡始知
幻待彼衆緣息

適興

神理固莫測闔闢無時停萬物盈兩間森然咸委形榮
悴從大化胡為勞其生悠悠念往時飛空如流星先哲
邈難逮撫已空無成嚴霜被中園蔓草猶青青晨夕自
遊目亦足陶吾情

答徐以文

我本不羈士少年知遠遊結交盡豪俊英風邈難儔浩
然志四海壟斷非所求羣雄亂天紀誓將除國讎驅馬

向京邑道路阻且修曠望空歎息失計成淹留時哉苟
未會白壁寧暗投恥同五鼎食笑視千金裘素絲尚游
俠枚臯事俳優知己竟不遇行藏誰與謀白日如逝水
冉冉春復秋人生久羈旅豈不懷故丘芳時倏徂謝悲
緒寒飈颭容華易憔悴安能常黑頭放歌吳門市洗耳
長江流雖然不得意常為蒼生憂心隨去雁遠目送孤
雲愁夫子東海裔濟代多良籌既無陳仲舉雖賢罕見
收何如共脫屣速駕赴滄洲

有感

退之少苦貧干祿頗浮躁長安三獻書時宰終不報饑
寒日哀鳴踰壯已曠眊向非董張徒宦轍誰與導少年
屢推抑大器天所造苟不涉患難尤足長雄鷲嗟余樗散
材時邁未聞道雖云寡知己敢忘固窮操徇利多乞墦
賈名爭媚竈薄俗諒如斯何事傷懷抱

寄陳彥博奉常

雨收山氣佳日入川光暝
岼嶺倚孤松飄蕭發清興
花

藥紛滿畦桑麻鬱成徑
西林宿鳥歸前溪漁榜定曠望
絕人踪坐愛郊原靜撫景念徂春思君一觴詠

以杜少陵文章憎命達之句析而為韻賦此

違世甘蕩落撫已徒憂勤
既通金閨籍方思策奇勲胡
為竟殺翮復與沮溺羣
念往每慙咎縱學求多聞朝飲
西澗水暮宿東山雲
境靜息疲繭心清遺垢氛
森然富藻思載道非空文
尚賴特立操千載揚清芬

其二

積雨滿污瀆蛭螾聊自藏盲飈振修薄篋露依崇岡動
植各生遂伊人獨何傷謫居窮田野與世殊相忘緬懷
昔憂患髮短心日長所願免饑渴孰敢謀膏粱戶庭罕
遊跡琅然誦文章歡來意自得遐想超黃唐從此遂閒
逸投老終徜徉

其三

鱣鯨擊洪濤一躍龍門登驚風落潮汐失勢投岡陵鬐
鬣日已槁窮涸何由興翻為獷獫笑敢望餘波騰畸人

感物理冥思多所徵雲翔避矰弋淵潛避笱罾胡為徇
世務輾軻常兢兢最哉保素履勿貽人所憎

其四

荆璞不善藏輕售與時競雖無泣玉恥棄捐揜光瑩伊
余昧先幾妄往成蹭蹬貪得違素心徇名忘積行通籍
曾幾時三年絕朝請久睽徒侶歡轉失鄉黨敬剝喪匪
偶然且委時與命

其五

功名期宦成文章止詞達千載求全能如何罕竒拔夙
抱稽古志纂言窮隱括幽闡新機深精思元化幹豈徒
賁皇猷將以繼往末撫今不自足乃復恥被褐好爵難
久縻世途多怛怛放意樂丘園長歌襟抱豁

送程彥明之松江

同是他鄉客俱為避地人興來猶浪迹別去更沾巾山
路常疑雨江花已報春荒煙投遠戍落日扣通津樵笠
歸墟盡漁蓑度水頻揚帆驚宿鳥鼓柁駭遊鱗俗薄誰

知己時危不計貧飄然滄海上也欲共垂綸

移居為錙朝佐通守賦

佐郡辭簪紱移居遠市廛樓高饒壤地瘠喜幽便芳
樹層簷合嘉蔬隙壤連承顏傾孝敬視膳沃肥鮮製錦
聲華滿分符惠化傳輿談誇息駕醇飲愧張筵繾綣情
彌厚殷勤意更專銓曹行考績未許賦歸田

題江行初雪圖

宿雲黯慘埋巖壑疾風颯颯梢林薄孤舟擺浪何處來

雪片縱橫向人落一翁蓑笠度危橋一翁荷擔轉山腰
崖傾石凍行偃僂不辭辛苦歸途遙君不見軟裘貂帽
馳快馬遮莫冰花徧原野人生得意能幾何相逢俱是
窮途者

送徐照磨從軍

長淮奔流東到海環疆千里多名都其風剛勁自古昔
異才挺出無時無徐君夙負青雲器少年猶覩承平治
操筆嘗隨驄馬行文史由來曾歷試蕪城繁華天下稀

揮金佩玉爭光輝，干戈一變莽蒼出。君亦逃難吳江湄，故鄉悵望歸未得。大藩開府先推擇，英聲洋溢動當時。彈冠再作諸侯客，襟懷絕似南湖清。王事賢勞心靡寧，亂離幸得倅鄉郡。欲往豈料邊塵驚，聞道元戎飛薦鶚。掀髯應辟青油幕，戎嚴何必屬橐鞬。等閑談笑三軍却，扶顛實藉英雄材。欲成勲業須時來，嗟余何日去環堵。與君攜手黃金臺。

次陳彥博博士寒齋四詠韻

燒燈看書

窮經夜焚膏晷短歎冬日孤影戀餘光
趺坐寒齋寂寞思聖途遠時邁恐無及
假寐竟忘疲匡牀散縹帙

熾炭烹茶

霜寒陰始凝剝盡陽來復因觀薪火傳
悟此道機熟汲井烹露芽聊饜畸人欲
滌慮蕩塵昏神清光溢目

袖手微吟

薄宦不成名歸來聊藉手窮通每自悟
得喪復何有誰

云松栢林而不生培塿邈矣歲晚期微吟思靜守

擁衾清坐

趺坐擁重衾靜聽窗間雪心清文思深理會塵情絕良
璞須善藏素衣還易涅坐久覺光生東軒上寒月

贈章安甫老人

籃輿迢遞出郊坰野服翩然鶴髮星柱史不辭周問禮
伏生須為漢傳經汀洲水落蒹葭老澤國霜寒橘柚青
自笑隱淪緣底事時危踪跡一浮萍

徐德原司丞隱居

放棹南湖水深昔年遊覽得重尋
陶公未許辭彭澤
龐老那容隱漢陰
落絮雨餘霑墨沼
遊絲風暖冒書林
自憐久客渾無賴
亦欲攜詩與盃簪

送宋時中還海昌兼簡王好問提舉

十年湖海共飄零
蹤跡渾如水上萍
宋玉愁多成九辯
王通思苦續羣經
鯨波日落千尋碧
鶴嶺雲開萬疊青
君等懷才須世用
弓旌早晚出虞廷

簡蒲菴長老

論文猶憶自前朝，亂後誰憐意氣消。
元亮歸來依惠遠，少游客久遇參寥。
山房黍熟供蔬甲，石鼎茶香薦菊苗。
名勝想無今古異，禪龕容我避塵囂。

寄蘭照磨

天開泰運息兵塵，建業千年王氣新。
虎旅南征收百粵，龍旂西指定三秦。
春明紫禁煙花繞，日麗彤樓燕雀馴。
朝罷從容須獻替，要含膏澤及斯民。

次趙耘軒見寄韻

曾遊海上望蓬萊結友惟尋世外才
宏景已聞勾曲去圖南重見華陰來
大鵬奮翼輕千里獨鶴凌風徧九垓
我亦吹笙雲漢侶誤撓塵網轉堪哀

城南小隱為松江郭彥禮賦

步屨幽尋古岾隈柴扉正對郭南開
林間野徑穿雲入溪上春潮待雨來
過客停杯歌白苧隣翁吹笛坐蒼苔
羨渠高隱空相憶浪迹多年素髮催

題倪雲林竹石

卷石不盈尺孤竹不成林惟有歲寒節乃知君子心

題畫

窈窕雙青蛾流盼瑤臺鶴自怨鎖芳塵似欲遡寥廓

題水雲深處

落日汎南溪野艇沿流去隔水望儂家雲深杳何處

題凌媪隱居圖

陶令歸來日躬耕不厭貧問誰解同志賴有翟夫人

題扇

雨過蒼苔石幽篁翠色浮南軒曾對此瀟灑憶清秋

墨梅為李鍊師賦

誰向隴頭來寄此一枝雪莫負歲寒盟道人心似鐵

題紅梅

紅綻南枝玉芳姿綽約新不將明媚色競逐艷陽春

苔川夜宿

山繞荒城水自流霜空月色滿溪樓夜長欹枕渾無寐

二十五聲都是愁

龍江旅舍

岬回山轉疑無路
潮落江清淺見沙
睡覺蓬窗寒日上
不知身在野人家

次薛鶴齋真人見寄韻

贏得閒身便入山
只留名字在人間
最憐白髮多情者
直待移文始厚顏

題陸濱村舍壁

記得移家白露時
秋風又是一年期
獨憐零落溪邊柳
那得長條繫所思

閨思

絳桃不似曉粧紅
思譴多年出漢宮
自惜傾城多薄命
莫教明月照閨中

次葉楚芳見寄韻

梅子初黃晚雨收
閒身猶著木棉裘
誰憐白苧新裁就
回首西風又是秋

次陳彥博太常南湖閒步韻

乘閒迂步共尋僧家住寒山第幾層自許他年挂冠去
幽棲終不愧孫登

題盧元佐所藏江山圖

結茆曾住白雲間遊宦多年客未還開卷偶然鄉思動
數峰渾似鄂州山

附鮑恂

字仲孚秀水人有西溪漫稿

三友詩

友道日凋謝伐木久無詩詎謂草木間友道反不虧娟
娟白玉英落落蒼龍枝復有青琅玕歲晏以為期相看
冰雪中節概不少移豈不念軫軻守貞理所宜物性尚
如爾人情良可悲勗哉三友交吾當視為規

題吳仲圭平遠圖

蒼山遙遙幾千里綠樹參差碧空起雙帆忽從江上歸
影落斜陽濕秋水林陰蒼莽鳥不飛石徑蹒跚行人稀
松根似可縛茆屋沙尾亦足容漁磯我嘗西遊倚江閣

極目長空入寥廓好山不肯過江來恨不乘風跨黃鶴
吳君畫手當代無落筆何年成此圖安能著我巖壑底
相覓老樵尋釣徒

題五雁圖

薛生三鳳世所稀荀氏八龍殊絕竒郭家兄弟稱五雁
孝友尤為人共推當時八月驚飈起五雁分飛隔空水
十月天清五雁歸相呼相喚蘆花裏我識郭家五弟兄
早學書詩俱令名開圖見雁發深感萬里長江無限情

我今試與五雁語從茲休落瀟湘去瀟湘水深多網罟
明年花發玉階春玉階鶯鶯多如雲願汝飛去同為羣

南風琴送王文伯之任

重華宮中白日長山龍絢爛垂衣裳玉階朝罷南風起
干羽不動生微涼是時治定作韶舞中有桐琴音最古
坐把五絃為揮弄不覺南風滿窗戶一彈民愠解再彈
民阜財直令四海億萬姓熙熙鼓腹登春臺時有五色
鳳飛來表休瑞雖雖玉階前亦感重華意重華之意良

苦深意在生民不在琴九疑雲冷世已遠人人爭欲聞
其音祇今重華御八極每彈五絃長嘆息南風長養百
餘年黑髮蚩蚩豈能識我持此歌送使君生民久待南
風薰承宣政是君所職願早流播人間聞

題吳越兩山亭

新亭卓絕倚雲端兩岼青山繞畫欄衆岫西來馳萬馬
數峰東去跨羣鸞海門帆影煙中見江樹秋容雨後看
千古興亡無限事邊城又聽角聲寒

題扇

松陰翠落千崕雨瀑布泉流百丈冰六月山人長衣衲
不知人世有炎蒸

除夜偶成

絳蠟高燒爆竹鳴羣兒奔走喜還驚老夫識得春來慣
直伴梅花睡到明

李進

字孟昭海鹽人
號西園居士

遠別離

舊別離新別離人生別離無定期前年郎遊蜀山去今年又客黃河西黃河之水直向東海流滔天捲地無時休不洗人間離別愁蜀山崢嶸嶮而固六龍回日車猿鳥亦難度不斷人間別離路別離之情良可傷白日苦短關山長關山長白日短鑿山填河河又滿河又滿愁難平妾顏未老郎無情

題耕織圖

西疇昨夜膏雨足村村綠樹啼布穀農夫相喚整鋤犁

早起驅牛出茆屋土腴牛健耕易深暖雲籠日春陰陰
斜陽未下終十畝一卷遺經行自吟山妻相敬如賓友
炊黍烹葵饁南畝溪邊濯足隴頭坐高歌且盡壺中酒
年來不用憂旱澇高田宜黍低宜稻官租納足食有餘
社酒雞豚自相勞人言耕夫苦我道田家好但願五風
十雨年穀登室家團圓永相保

其二

吳蠶作蠶明于雪苔雪之水清且冽東隣西舍縲車鳴

銀絲出盆光皎潔官稅已輸私債還美人曉織綠窗間
嬌鶯睨曉機聲度春筍參差玉指攀織成素絹堅且緻
先奉翁姑後夫壻朔風吹木霜霰飛夫不憂寒妾如意
君不見青樓艷女好蛾眉留客高歌送酒卮纏頭蜀錦
不知數黃金暮盡朝別離不如田家荆布妻貧富苦樂
長相隨採桑養蠶繰好絲年年織絹製郎衣

題畫松

君不見靈隱山前小朶峰入山九里皆青松怒濤翻空

捲江海高枝挂石碯虬龍西湖三月春意濃錦囊駿馬
呼奚童清陰夾道生爽氣金粉撲面香濛濛兩年不踏
湖頭路轉眼春來又春暮畫中忽見一株松彷彿山前
幽絕處幽絕之處多仙靈吾獨何為縛塵纓寄謝仙靈
許同隱準擬長鑱尋茯苓

丹陽道中

茆屋雞聲催早起僮僕相呼戒行李擁袍無計衝曉寒
野店村醪薄于水羊頭小車鐵裹輪後催前挽聲轉轉

平原極目但衰草西風忽起迷沙塵坦途纔過十里餘
行行曲磴多崎嶇松林杳藹不見日凍霧作雪沾衣裾
黃土山岡高復陡車夫努力成牛吼須臾下坂一何易
勢若駿馬爭先走嘗憶當年未為客縱覽方輿徧圖籍
太行蜀道雖漫聞七里八岡今始識男兒初生挂弧矢
豈分拘拘老松梓他年會作子長遊賸賦新詩滿人耳

幽居

雨後看新水天空望遠山入雲蒼隼健坐浪白鷗閒酒

盡壺還貫詩成字重刪才疎信樗散非為惜朱顏

過湖

歸心喜便風孤棹出吳松急雨捎寒浪殘雲逐斷鴻漁人舟是宅龍伯水為宮浩蕩煙波裏長吟興不窮

溪居圖

畫裏溪山好溪亭事事幽闌干三面水風月四時秋野老時分席漁人每繫舟此中容隱逸何用覓丹丘

晚次毘陵

舊壘斜陽裏孤舟野水濱
高風懷季子俠氣想春申
樹古鴉啼暝橋危客問津
漁歌何處起旅泊易傷神

題畫

淡墨寫生綃微茫景色遙
白雲迷谷口綠樹遶山腰
此地真堪隱何人肯見招
浮生但適意不必問漁樵

擬賦新宮

海宇澄清泰運開城懸北斗
佳蓬萊金銀宮殿千門啟
玉帛衣冠萬國來瑞氣氤氲
籠寶座仙韶縹緲奏瑤臺

做臣幸際明良會願獻神堯萬壽杯

過徐州

官船千里過彭城陳迹荒涼草樹平
項籍臺空無舊業坡仙樓在有餘清
天邊夕照孤帆影洪口春雷白浪聲
過客題詩成感慨青山猶帶古今情

春興二首

聽殘鷓鴣雨中聲歲歲芳時不稱情
酒債詩魔縈病骨柳煙花霧鎖愁城
登樓此日思王粲作賦何人薦馬卿

見說滄浪歌可愛投簪東海濯塵纓

午睡沈沈飽墨甜惱人幽鳥語前簷扶頭酒醒猶欹枕
花信風高不捲簾世味久諳刀上蜜人情已識水中鹽
知心只有青青竹冷淡相看更不嫌

王母瑤池圖

臺殿參差近碧天房櫳屈曲窈相連瑤池淡淡涵秋水
珠樹濛濛護曉煙雲外鳥來知七夕風前花落是何年
恢諧却笑東方朔三度偷桃未得仙

春暮有懷李孟璿

暖雲無力度隣牆，風裊遊絲拂地長。
深院獨眠淹病酒，袷羅初試淺熏香。
新巢燕子來如約，未謝梨花待洗粧。
綠草滿池春欲去，幾隨詩夢到君傍。

紅白蓮花

翠蓋亭亭映碧漪，濃粧素質兩相宜。
華清賜浴春酣後，虢國承恩月上時。
錦幃風輕波潏灩，玉杯香冷露淋漓。
茜裙又作霓裳舞，清曉來遊太液池。

題豐樂樓圖

錢塘城郭帝王州，勝概千年尚有樓。
南浦雲開珠箔曉，西山雨歇畫闌秋。
玉人歌舞成春夢，芳草王孫非舊遊。
物換星移餘事在，蕭條殘墨不勝愁。

漂母墓

淮陰城下有荒墳，過客維舟慘壯魂。
一飯當時非責報，千金異日果酬恩。
雲迷馬鬣封難認，草沒龜趺字已昏。
多少英雄困貧賤，世人誰肯念王孫。

淮陰懷古

淮浦南邊曉繫舟，擬尋遺跡弔韓侯。
酬金墓在蒼松古，仗鉞壇荒碧草秋。
功並良何誠不忝，生儕絳灌亦堪羞。
風雲消盡英雄氣，楚水無情日夜流。

題畫

飛花入簾宮，漏長遊絲落絮春。
茫茫金鞍駿馬青絲勒，綺閣小姬紅粉粧黃金。
作丸落花底，啼鳥隔花飛不起。
明朝更欲載東風，早買樓船放春水。

金橋柳色

官橋送別繫蘭橈
官道垂楊拂畫橋
煙鎖翠眉如有恨
日搖金縷不勝嬌
渭城朝雨離筵散
灞岸東風客路遙
君上皇都春又晚
花飛晴雪映趨朝

畫竹

解箨初聞粉節香
拂雲又見影蒼蒼
鳳凰不至伶倫老
無奈荆榛特地長

集句

潯陽向上不通潮
離別河邊綰柳條
回首可憐歌舞地
玉人何處教吹簫

西湖夜宿

寒驢衝雪岬烏紗
夜醉西湖賣酒家
十六吳姬吹鳳管
捲簾燒燭看梅花

附李孟璿

訓導汝寧
有南莊集

獨漉篇

獨漉獨漉愁人心
泥水没人濁且深
明月不可見明珠

那復尋昨夜牀頭三尺鏡躍鞘時驚吼嗚咽父仇未報
恥未雪休論明珠與明月羣象不須斷蛟鱷不須剪與
仇戴天古所戒獨漉獨漉君當勉

坦然老人歌

坦然老人真坦然不求才行人間傳不賦蜀道難懶和
滄浪篇送窮乞巧皆無言坦然心地何所似皎皎白日
懸秋天桑麻田松菊園乃在武林清溪邊傍溪茆屋只
數椽朝出耕夕安眠兒女嬉笑南窗前皇天平平無黨

偏坦然老人真坦然我欲移家相近時周旋

烏夜啼

烏夜啼向何處啞啞繞妾庭前樹天涯遷客天應憐烏
亦有情啼不去定知明日天恩到天遣啼烏夜先報烏
兮烏兮從爾啼爾知妾苦為妾悲妾自促寒機織錦製
郎衣衣成寄遠道願郎衣著蒙恩早郎衣錦歸有時爾
烏長宿庭前枝

題山水圖

大江之南多崇山層巒疊嶂青迴環山中去天不盈尺
我昔與客嘗躋攀凌空直上最高頂恍然身世非人境
蟠桃子熟近瑤池船藕花開通玉井下視羣峰列四傍
蒼松古木煙茫茫琳宮梵宇互隱現丹崖翠壁相輝煌
別來尋常形夢寐忽見此園無乃是浩歌寄謝山中人
目送飛鴻去千里

次韻艷體

閨苑迢迢碧海深青鸞飛斷信沈沈春深香冷銷金帳

夜靜聲閒綠綺琴
殢雨游雲頻入夢
落花啼鳥總傷心
玉簫何處吹明月
目斷關山不可尋

明妃

玉筋雙垂出漢朝
邊塵滿騎路迢迢
琵琶曲盡腸應斷
環珮魂歸恨不消
沙起黑河風冽冽
雲埋青塚草蕭蕭
黃昏獨有荆門月
長向空村照寂寥

和孟昭春興

憶過蓬萊海上家
春風長日駐韶華
九天風度瑤池樂

五色雲迷玉洞花雷煥多情求寶劍葛洪何處得丹砂
到來彷彿三千歲夢落紅塵隔紫霞

題金碧山水

雨餘山色暖凝春人掩柴門卧夕曛江上圖書和月載
山中雞犬隔煙聞東風瑤草香初滿流水桃花路不分
此處仙源知不遠底須騎鶴訪茅君

陳約

字博文嘉興人
山西右布政使

促織吟

促織何唧唧一片秋聲滿虛碧昨夜啾啾語牀下羸婦
咿鳴淚流臆婦言上有翁痴女未解櫛丈夫畫作田何
以事促織促織胡爾為促織胡爾悲空階月白風淒淒
豈不聞高樓女兒畫雙眉春來秋去蠶不知越羅蜀錦
花滿枝

其二

促織何唧唧我聞婦言重於悵歎生不逢堯舜時天下
干戈未休息且無八百桑又無二頃田江湖事筆硯卒

歲衣裳穿促織有靈性促織聆我言江天木落秋無邊
胡為夜夜啼我前不聞民間征輸急星火里胥鞭答淚
盈把

為臧德中題古巖

古巖之巖深若壺壺中之樂神仙都不知幾世幾千古
無乃出乎上古之古初巨靈劈山山盡裂秦王驅石石
為竭石為竭先生此巖獨無恙先後迴同天地滅即今
巖谷易變遷海波朝暮成桑田此巖亘古常晏然更祝

不崩亦不騫永與南山同乎千萬年

二月二日友人王景萬園中牡丹初發景萬置酒邀余賞之因令作詩以發其不平之鳴為

賦七韻

江南二月氣初淑牡丹葉抽攢嫵綠插竹成竿扶婀娜
築臺盈尺增發育不與桃李爭春風豈逐繁華共麗俗
待看淑氣過艷陽杏桃落盡無餘香數枝獨殿百花吐
天然富貴輕尋常萬紫千紅總俱後芍藥荼蘼顏亦厚

吁嗟世事何不然且盡花前一杯酒

錦屏仙踪

赤城多奇峯錦屏亦殊勝不知何仙人遺跡在幽徑松
霏灑石牀竹雪墮風磴徘徊對巖花忽送一聲磬

寄鄉中諸故人

相逢何必論萍蹤旅食京華又朔風老去豈知身入宦
覺來全覺夢成空鱸魚故國萼絲晚雁影寒江木葉紅
為問南湖湖上月幾時詩酒共諸公

天壽日侍宴

山龍黼黻殿中間
象貝犀琛貢百蠻
星拱已歸天北極
嵩呼齊祝壽南山
瑣窗虹貫金蓮炬
丹陛春聯玉笋班
白髮老臣何以報
也霑恩渥駐蒼顏

懷盛玉全

海上青山我昔遊
別來回首十經秋
諸峰羅立應如舊
獨客棲遲尚此留
每恨親朋多阻絕
欲傳書信恐沈浮
憐君只在秦溪上
相見何時解去舟

偶成

京華二月天氣好寒食已過清明來畫樓朱箔燕新語
綠樹清江花亂開

陳絅

字簡文有竹
集約之弟

鵲鵲圖

露冷蓮塘水葉枯秋風枝上鵲鵲孤急難弟兄俱分散
水落沙寒日又晡

題扇

五湖煙水綠生波一葉扁舟鼓枻歌遙想故園戎馬後
千章喬木已無多

秋風吹上老漁船蓴菜鱸魚味自便對此雲山無限好
不須圖畫入凌煙

陳繹

字思文
約之弟

和吳景長秋興韻

瀟瀟風雨洗秋旻頓覺乾坤萬象新畫棟雲飛嗟帝子
銅盤露冷泣仙人鳳凰覽德翔千仞燕子辭巢別故隣

欲頌河清獻明主天顏一笑物皆春

桃根接梅

未見東風著小桃先看蓓蕾綻紅椒
種從王母來時度魂向羅浮夢裏招
妙奪天香回造化巧將雪色補嬌嬌
一聲鐵笛春歸也回首秦源道路遙

題竹

叢篁不盈尺葉葉生秋風鳳凰何時來
食實巢其中

陳絹

字熙文
約之弟

白苧詞和沈孟明韻

盈盈窗間女悄悄事編織明明紅粉粒皎皎孤犀白妾
身不作清露塵妾顏不學巫山雲藁砧年少事游俠閉
門花落愁青春瑤階蟋蟀鳴金井轆轤響綆絕誰再續
因之重惆悵河東織女河西郎深夜起看登秋堂翠翹
銀鳳綠雲繞錦屏繡褥春風香昔為連理枝今成斷腸
草鸞去鏡空存膏沐為誰好妾顏漸改非昔年天上明
月何娟娟東家女子盪舟去玉手不採湖中蓮蓮生藕

有絲零落怨秋色花開猶有時花落恨無跡問郎欲歸
趨何時念妾日夜愁空閨白頭鴛鳥不飛去海枯石爛
雙依樓

壽仙曲為愛山翁

仙人愛山山中居白雲為裳霞作裾山田種石不種穀
石子千載成瓊琚梧桐高岡生鳳雛鸞停鵲峙相追趨
東風吹花映繡襦花下拜舞為歡娛松泉遶溪溪遶屋
琅玕青青瑤草綠朝度商山歌紫芝莫過藍田餐白玉

仙人玉立頎而長，龐眉皓首雙瞳方。
酣歌未終樂再張，王喬赤松皆在傍。
阿母來遺蟠桃香，青鳥兩兩先翱翔。
雙成飛瓊羅，雁行巢笙吹徹丹鳳凰。
敲金戛玉聲鏘鏘，飲以九醞瓊瑤漿。
一酌精氣流肝腸，神完骨蹻筋力強。
再酌毛羽生微涼，仰視六合思飛揚。
何當更酌富眉壽，後天不老凋三光。

雨中期張天傳以無舟不至

太乙馮虛不用舟，卧乘蓮葉渡中流。
斗牛夜射蒼精珮，

風露寒生紫綺裘
地隔蓬萊無萬里
鶴歸華表又千秋
仙家縮地如無術
安得相從到十洲

次吳景長秋興韻

十年朋舊總飄零
喪亂無書問死生
深院銀燈挑錦字
小樓明月理瑤笙
霜寒菊徑思元亮
秋老瓜田憶邵平
悵望佳人淚如雨
夜深腸斷楚歌聲

似張天傳

市涇真士有張騫
早歲辭家願學仙
古匣龍蛇秋仗劍

石壇星斗夜朝天洞中雲暗長疑雨鼎內丹成不計年
欲試囊中餐玉法明朝相約過藍田

和大兄甲辰歲九日見寄

霜後山林落葉稀黃花采采繞柴扉催租吏去生秋興
墮帽人酣又夕暉歲歟欲求菰米飯天寒偏怯芰荷衣
風塵如此須歸好手把長竿坐釣磯

送周煥文從唐伯剛之吳興

碧瀾堂下即吳興十里芙蓉繞石城山簡歸時應倒載

條侯醉後尚談兵
蘋洲雨過秋聞雁
橘里春深曉候耕
事簡好將樵唱曲
水精宮裏坐吹笙

東吳中永樂寺住持鼎虛中

梵王樓閣冠吳中
雲繞諸天會法宮
寶藏夜明珠出海
花臺煙暖雨隨風
庭松回指思玄奘
隴月迎人識贊公
劫後相看情倍好
詩成須寄具區東

過潮音菴訪澄海性

潮音精舍水中央
寂寞松門掩夕陽
翡翠蘭苔依水渚

鷓鴣鵲滿魚梁香消柏子春雲冷水滴蓮花夜漏長
人世干戈嗟擾擾欲從苦海問慈航

送道士謝清一歸吳中

丹鼎紅光照洞庭天壇月色帶疎星玄都道士蒼精劍
上界仙人白鳳翎閭闔朝回天蕩蕩藥珠經盡晝冥冥
欲從杖屨秋山裏風雨篝燈采茯苓

次原素上巳韻

落花如雪委蒼苔百歲逢春復幾迴流水羽觴嗟寂寞

石田茆屋未歸來，舞雩風暖宜童子。
修禊書成屬俊才，故舊相看情倍好。
雅懷今日為君開。

次近仁韻

長袖方袍墊角巾，逍遙天地一閒身。
匡廬結社邀元亮，鑑水維舟待季真。
飛絮游絲留白晝，野花幽草自長春。
林間無地容塵俗，祇許先生與卜隣。

秋夜懷明本

溪聲淅淅起蘆葭，溪水潺潺漱白沙。
大地星流還化石，

小窗燈冷不成花
江淮烽火三千里
城郭人民八九家
避地欲尋張博望
月明滄海汎靈槎

海上述事

浮生南北任流萍
漫刺江湖憶禰衡
雁去關河愁萬里
潮來江海月三更
燐光夜伴蛩螢泣
妖氣晴連蠮螋橫
欲向靈氛問人事
中原何日可休兵

野徑荒涼日欲晡
林棲水宿遞相呼
汀洲霜冷蘼葭老
山路秋高苜蓿枯
屈子壯心能忘楚
武侯遺恨在吞吳

便從海島尋蓬島先向鵞湖下鵞湖

憶昔扁舟過洞庭長懷七十二峰青三年跼弛吳中客
十載漂流水上萍作賦便思招海賈移文無復愧山靈
碧天寥闊秋如洗願借仙家白鳳翎

題馮克敬清風軒

層軒修竹翠重重萬葉秋聲吼籜龍冰盤蔗漿凝瑪瑙
金盤玉露瀉芙蓉脫巾挂鉢雲根淨拄笏看山爽氣濃
滄海月明歌舞地儘堪留客共從容

春波漁傲為王原魯賦

猩袍自脫換羊裘鼓枻長歌上釣舟山澤有人能忘漢
熊羆無夢可興周綠波芳草西湖上細雨斜風古渡頭
不是忘君與忘世盛時原自有巢由

雨中

日日江村聽雨眠風塵萬事總堪憐漂流未見民歸業
賦斂重教出市廛壯士有戈回白日豎儒無術補青天
故園夢想荒蕪徧茆屋蒼苔老石田

古巖為臧德中賦

蒼然辟立聳高寒元氣淋漓濕未乾
開闢自天留澗壑巉巖如玉倚林巖
壺中樓觀金銀氣洞裏神仙日月丹
擬欲捫蘿遊絕頂佇聞環珮響珊珊

禁煙日簡長如仲如二昆弟

朱闌六曲舊池臺甲帳珠簾已劫灰
舊鬼煩冤新鬼哭前人遺怨後人哀
誰將天地為棺槨忍見英雄化草萊
惆悵故園猶未返野花無主為誰開

湖頭誰復載吳娃
鷗鳥多情戀白沙
浩萬春深無杜宇
武陵何處有桃花
雨餘石燕晴歸穴
市近山蜂午報衙
看到前朝丞相墓
野人翻土種桑麻

禁煙日懷大兄

留春無計願春遲
花落空山有子規
翡翠樓香來杜若
牽牛引蔓上棠梨
文園多病猶為客
杜老應門亦有兒
田野寒煙不須楚
罷民無食已多時

觀醮

雲龍風虎護重關羽蓋霓旌繞石壇金闕九天開閼極
玉京羣帝集仙班秋橫劒氣連星斗朝罷仙音襍珮環
一點英靈渺何處夜深應共鶴飛還

弔古

投箸渡江江水空朝馳淮海暮吳中江東壯士輕王猛
吳下諸公失呂蒙山鬼有靈啼夜月野花無主怨東風
盡將骸骨填溝壑誰在雲臺第一功

題張原素書舫齋

水光雲影欲連空
長日吾伊或倚篷
天上星槎張博望
座中人物米南宮
歌臨赤壁舳舻仍扣夢
入山陰路可通
遙憶舵樓同晚飲
幾回搖盞月明中

竹枝歌次韻

贈君曾出雙南金
別君曾彈紫綺琴
斷金還比阿奴意
斷絃持比阿郎心

期郎歸時明月圓
明月已圓郎未還
妾顏不比昔時好
郎心不比昔時堅

石倉歷代詩選卷三百四十三

欽定四庫全書

石倉歷代詩選卷三百四十四

明 曹學佺 編

明詩初集六十四

朱善

字一廉
豐城人

蘭竹操

美貞婦方氏也

冬蘭青青列于階庭風雪所撓不枯不榮

冬竹猗猗陰于戶牖冰霜所摧不萎迺秀
彼美貞婦志潔行高犢犢朝夕不敢怨勞
有蘭之幽有竹之節守義不渝之死靡慝
夫也天只孰忍忘之子之幼矣誰其將之
夫也天只孰忍負之子之幼矣誰其顧之
適彼南畝言刈其麻我勤于績以定我家
適彼南園言採其桑我勤于蠶以實我筐
爾筐既盈爾家既寧迺教爾子勤于六經

學業既優克忠克孝維子之賢繫母之教
載歌蘭竹續彼柏舟猗歟方氏共姜之儔
蘭則有馨竹則有筠嗟婦之貞永保令名

遠別辭送餘干令李謙山

風淅淅兮雲悠悠木葉落兮天宇秋君胡為兮不返嗟
客子兮淹留攬西山兮秀色泛東湖兮弄明月樂莫樂
兮新知心奚忍兮輕別山有虎兮湫有龍勞余思兮忡
忡渺餘干兮何許揮五絃兮送孤鴻寫桂棹兮蘭舟揆

子祛兮夷猶南州雖好兮不可以久處嗟子去兮何以
慰我之離愁

漁父還劍辭

日之將夕兮道阻馬罷波流浩渺兮孰拯其
余毋可躋兮亶也其時子今不度兮後悔可
追爾劍雖寶兮余無所用之豺狼在野兮
水有蛟螭子持以往兮慎所歸履信蹈義
兮毋倒行而逆施吁嗟遠道兮後將余思

望雲圖詩為廣州大使熊悅作

瞻彼西山麓白雲何悠悠吾親舍其下望之懷百憂浮
雲不可捲逝水不可返遊子悲故鄉別親日已遠雲飛
可逾嶺母老難辭家豈無甘旨具奈此道路賒昨日鄉
親來老母幸無恙殷勤附書去慟母倚門望阿母望兒
歸兒歸未有期願母加餐飯慰子長相思人言居官好
何似還鄉早他日乞身歸甘舞老萊衣

舟中書所見

五牛牽一車四牛曳一犂耕田不費力運物豈愁遲露

冷草枯候天寒稻熟時農家享快樂父子共熙熙

又

清河五百里觸目興悠然客用驢馱物人驅牛曳船魚
鮮堪換粟束熟不論錢安得移家住教兒學種田

客省使溫田王西域人也載酒過翰林痛飲且
留詩因和其韻

金臺載酒詞林聚吟詩彷彿陰鏗句共是東西南北人
依然雲路還相遇君言我賦有金聲我亦憐君如玉樹

摘詞已喜錦生花屬思尤如繭抽緒且將綠蟻注清樽
莫遣烏鴉驚列炬夏宵苦短君意長忽覺雞鳴窗欲曙
請君上馬早朝天我亦束衣從此去

長短句

翁騎驢兒牽車童子荷擔相追隨風淅淅草淒淒阿兒
苦寒翁苦饑翁雖不語心傷悲吁嗟薄命當訴誰遼東
雖云樂不如早旋歸

九月初一日庚午出龍江驛

清晨辭鳳闕薄暮出龍江父子趨殊域詩書化異方楚
山雲渺渺遼海路茫茫但願身長健他鄉即故鄉

甲戌過桃源驛

迴與武陵異偶然名字同祇知迎驛使豈識問漁翁危
質慚蒲柳浮生愧梗蓬何由訪仙境不與世人通

八月丁丑至徐州城老妻病歿倉卒葬畢揮淚
登舟而去

病妻中道隕倉卒奈渠何老眼淚雖少中心痛已多椒

漿惟自奠薤露竟誰歌莫作他鄉鬼孤魂寄薜蘿

辛丑入安山湖

湖水渺無際篙工訴苦辛天風能送客川后不淹人風
浪排空濶雲山入望頻此生隨萬物何必獨傷神

庚寅入壽光縣界

浙浙風中黍蕭蕭露下桑始驚時物變轉覺道途長報
國心常赤思家鬢已蒼故鄉頻入夢煙雨暗前塘

辛卯趨稻田驛

涼風吹古道落月照空山雁過人開戶雞鳴客度關愁
多心緒亂身老鬢毛斑欲就君平卜茲行幾日還

聞雁

汝向江南度江南我故鄉雖無書達意却有淚成行淺
水浮蘋藻良田足稻粱秋來鷹眼疾去去亦須防

丁酉至蓬萊縣

兩年居禁苑一日至蓬萊海上煙波隔人間歲月催野
鷗從此泛仙鶴幾時回惟有王喬舄雙鳬數往來

廿九日戊戌別刑部從事仇文炳

累月陪歡笑君歸我獨行幾時重會面異國倍關情匹
馬回京遠扁舟過海輕故人來問訊憂喜轉相驚

望嗚呼島

五百田橫士中心出至誠寧為同日死不苟一時生島
有嗚呼號人留慷慨名至今觀信史遺恨幾時平

至金州驛和軍中秀才柴景巖韻

邂逅金州驛蕭然一旅人身居滄海外家在大江濱酒

至愁先醉詩成覺有神相看兩不厭孰為主和賓

與金州張王二指揮同宿諸窩鋪

海舟曾共濟山館復同眠楫杙燒新火糴稊解舊羶三
盃雖率爾一枕且恬然明日遼城路君應到在先

古廟松風

遺廟不知何代建蒼松還憶古人栽遙聞午夜風濤起
疑是半天風雨來

龍灣曉霧

龍灣之水何縈迴
曉霧濛濛午未開
應有蛟龍現神怪
向空噓氣作樓臺

手山擎月

仙人已乘白雲去
仙手猶擎孤月寒
好拉洪崖同跨鶴
仍招子晉共乘鸞

蓮池垂釣

露冷風清池水秋
蓮衣落盡藕絲柔
誰人正把任公釣
豪客方眠太乙舟

附王佑詩

字子啟泰和人仕至廣西僉事

夜泊采石懷李白酬酒邀月共酌

清夜宿采石浩歌懷謫仙海風吹明月飛上青天懸月
光宛如昨太白久不作呼酒坐船頭邀月共斟酌大江
如平天倒看明鏡圓水上皆白雪流光入余船當時豈
真醉捉月猶兒戲千載笑疎狂幾人會高致我今問婦
娥百歲愁常多古月至今好今人如古何謫仙倘遇之
便好同樽酒明月成三人相逢足為友期君君不來輕

掉酒船迴但得天上月長在掌中杯

三山樵者歌為湖廣僉事王子正賦

福州城裏三山好聞爾採樵曾結廬每嘆為官出山早
何如習隱在山居山中喬木凌霜雪清廟明堂嗟未得
豈無松栢成棟梁亦有椅桐中琴瑟我修我斧持我斨
清曉出門行路長初涉寒流度前澗更攀危石上高崗
崗頭遙望扶桑日海底紅輪湧波碧照耀青天絕片雲
奔涯翠壁光相射黃鸝谷口鳴嚶嚶白石峰陰同坐行

辛苦不辭長食力幽栖已慣豈逃名大材當為時愛惜
朽樸由來足薪積許許寧知歌自悲丁丁遠聽聲何急
日斜樵伴邀同歸萬壑千巖行者稀薄靄餘霏昏竹徑
斜陽返照入荆扉當時自分貧亦足與世相違謝榮辱
玉局時來石上看青編夜照薪餘讀明時搜士徧丘園
未帛徵求忽到門金馬玉堂親召見繡衣鐵鉞遠旬宣
山中白雲隨共住甚欲還山不能去芳草應迷行徑蹤
綠蘿長覆閒處吁嗟窮達在人生俛仰興懷感慨并

傳說旁求從版築阿衡聘起自躬耕古來出處有如此
豈但于今應時起報効垂休竹帛間還歸重卧雲蘿裏

題蕭彥翀雲構

青霄萬餘仞白雲千百重不在太行九折坂不在匡廬
五老峰海東高人蕭彥翀紫髯如戟顏如童卜居不肯
向巖谷乃欲結構雲之中雲下來兮栖素櫚秀色可攬
光纖纖曉晴潤氣拂蕙帳暮冷清陰飛竹簾鳳臺之素
娥為吹紫簫曲曲罷青天高澄澄如碧玉露洗三更寒

煙飛一庭綠君家世躡青雲梯方厓鐵面秋霜飛繡衣
春當霄漢立勁翮凜凜凌虹霓子亦胸襟隘寰宇曾泛
靈槎訪牛渚好登雲路早從龍大濟蒼生作霖雨

題蕭雅言武山讀書處

武夷山容春更清員如仙髻方如屏中峰遙對章江水
松頂平臨大角星憶我山中尋武姥手招陶皮二仙侶
泉陰芝草春自香洞口琪花夜初吐武姥瑤壇凌紫霞
骨青髓綠顏如花謂言富貴等塵土授爾長生九轉砂

龍吟虎嘯綵鸞唱夜半烏飛曲江上山中留得煉丹泉
疑是銀河瀉千丈我祖前朝曾監還愛蘭諸老同栖山
武山福地金字額至今照耀雲林間聞君讀書隱巖石
笑我被徵去鄉邑手種巖前幾箇松應有清陰坐沾席
君今解組賦歸休我復乘槎事遠遊想得雲峰峰下石
待君高枕聽泉流涼風吹月從西度玉盤掛在長松樹
遙知夢覺石巖秋應憶朝迴辟雍署武姥雲端如可逢
江南為寄玉芙蓉倘得丹成天上去相從八極跨雙龍

自城陵遣阮庚上桂林候姪伯貞挈家過峽州
却圖入蜀追賦二首

遣爾迎妻子殘冬到峽州
瀟湘俱便道灩澦正安流
書挈母遺墜舟行莫滯留
鶯花春二月相見錦城樓

又

念爾何時見相離七月餘
如何千里道不寄一行書
老恐妻孥隔貧嗟骨肉疎
錦城宜早到詞賦訪相如

松滋縣

乃爾松滋縣清妍似故鄉
碧湖浮片月紅樹著新霜
見客征魚稅思兄憶雁行
峽州知不遠雲際疊青蒼

雲安夜泊同子祺諸公分韻

今夜巴山雨蕭蕭江上聲
短篷依岸宿遠火隔灘明
已迎雲陽驛初辭夔峽城
中途仍擬別去住若為情
歲月愁顏改山川離恨并
歸期雖未定畢竟共朝京

望湖亭

吳城高處望湖亭
天影低垂入杳冥
江合東西成巨浸

川分清濁會滄溟夜寒機杼鳴蛟室晚霽帆檣集雁汀
頗恨登臨情不盡廬山雲掩半邊青

小孤山

彭蠡東來一片山雙堦屹立水雲間乾坤開闢遺孤柱
江漢朝宗會此關春雨魚龍隨變化秋空猿狖怯躋攀
今來古往俱陳迹惟有潮頭到復還

過安慶弔余廷心

左轄當年鎮皖城江淮千里日交兵四方共倚雄藩在

一木孤撐大厦傾高節分明成蹈海奇才磊落見行營
至今書疏留遺恨丞相旌旗不遠征

夜宿臺中明朝拜封岳瀆詔

宮闕深沈夜氣寒月鉤初上碧雲端羽林侍衛羅千士
粉署趨朝宿百官銀鑰已橫金鎖闥絳紗遙度玉闌干
明朝岳瀆頒封詔四海神人總奠安

過臨臯驛賦簡胡子祺

晚涼官驛過臨臯訪古遙瞻赤鉞高粉堞浮雲生暝色

長江明月照秋毫
洞簫吹落王喬舄
宮錦裁成太白袍
便好與君沽美酒
中流擊楫酬英豪

謁狄青廟

夜入崑崙破敵關
長驅駐節望仙山
兵威已振遐荒肅
寇首寧容大理還
春雨蘋蘩遺廟在
夕陽林木戰營閒
將軍千古平蠻績
馬援真成伯仲間

贈別裴伯升

清江科第舊名家
千里初乘出使槎
離別可憐芳草色

淹留又過刺桐花香爐煙底晨趨珮畫角聲中暮散衙
歸到栢司還問信相思雲樹海天涯

潯州司中

青山積翠壓城頭四月高堂氣似秋藤峽西連徭洞險
牂江下合鬱林流茅茨繞郭炊煙起榕葉盈庭宿雨收
頻首歷階雙拜跪安南貢使入中州

舜廟

南海蒼梧萬里遙重華遺跡在山椒地靈尚憶迎龍鼓

天籟如聞奏鳳韶大禹玄圭功已告二妃斑竹恨難銷
小臣再拜瞻龍袞但覺薰風滿袖飄

御史孔希古送別

十八人中同受詔四千里外獨之官九重雨露雲霄迴
六月冰霜瘴海寒自是良材掄枯朽由來至寶數琅玕
天南日夜瞻金闕報主應同一寸丹

湘陰劉臯獨醒亭

乘舟四月過湘陰湘水沈沈湘樹深百里元非仇覽志

獨醒因續屈原吟清風洒落猗蘭浦
細雨蕭疎斑竹林
數載相逢重會面洞庭無底是離心

謝劉子高惠冰

御井開冰賜近官故人馳贈出朝端
天霜積塊承金盃
雨露融英薦玉盤受賜知君恩最重
分嘗令我病先安
憶曾烏府居長夏近侍擎來滿座寒

登鳳臺

鐘山秀疊御屏風金闕端居紫翠中
千里帝畿王地濶

萬年天塹大江雄
員方圭璧親承祀
華夏車書總會同
却笑嬴秦為計拙
東南王氣本無窮

贈四明任思賢侍親還鄉

聖朝孝理侍賢材
羨爾辭官得放回
千里白雲親舍在
一帆飛雨客船開
板輿侍奉追潘岳
綵服承歡作老萊
想得慈顏長壽考
萱花堂上即天台

彭澤懷陶靖節

彭澤江皋五柳色
維舟幾度憶高人
孔明千載當為友

劉裕終身不得臣酒熟歸來從醉醒詩成贈荅到形神
當時笑傲東籬下祇許南山日夕親

湖口驛寄家書感懷

湖口垂楊古驛開西風重繫采舟迴月浮彭蠡玻璃碧
雲擁廬山錦繡堆見雁謾題千里字買魚聊醉九江杯
故園三徑存松菊得似淵明歸去來

荆南舟中寄華容孫景賢臨湘黃允中

故人不見十年餘聞說華容早卜居湖上屢傳千里棹

江南不寄一行書別來每恨知心少老去翻令會面疎
得句荆南煩去客芳春問信到茆廬

白帝故城為偽夏屯營之所我朝侯總兵駐大
旗山遣諜出瞿嵐渡據其上流射殺偽平章
鄒遂下瞿關今其營壘分兵守之即事

上將西征百萬艘大旗山下駐旌旄巴渝未下聲先振
瞿峽相持勢兩高間道便如持幟入緣崖不用裹羶勞
天兵四海俱臣妾恃險無知笑爾曹

先祖父諱日宿青城哀感

青城山縣懷先德萬里江南未得歸
手澤至今存典籍容顏無復見庭闈
鄉塋宿草荒春雨蜀道疎林澹夕暉
兩袖東風歸騎遠傷心惟有淚沾衣

荻港值雨

白浪如山雪作堆淮雲將雨渡江來
畫船撐入蘆花港掩却篷窗半面開

夜過雷港驛換舟

月暗江天睡不知
棹夫催起換船遲
滿衣涼露扶殘夢
正是趨朝待漏時

暮過湓城

琵琶亭下換官船
江漢秋來水接天
莫問英雄千載事
湓城蘆荻鎖寒煙

石倉歷代詩選卷三百四十四